

欽定剿平三省邪匪方略

欽定剿平三省邪匪方略正編卷五十

丁巳年

九月十一日

丑

額勒登保福寧奏言

臣

福寧因

後路官兵未到二十八日在天花坪督催前進

並於各山搜剿餘孽

臣

額勒登保卽於二十八

日帶同巴圖魯侍衛官兵等自天花坪至牛駝

背黃楊坡一帶山梁剿賊當將官兵分爲三隊

富森布綸布春等帶兵從八角廟截其左慶溥

帶領許文謨董寧川從沙底截其右

臣

額勒登

保督同豐紳薩克坦布等由中路直入賊匪見

官兵突至搶上山梁集衆放鎗並約有矛子手

一二千隨後與官兵迎拒經官兵分合衝殺賊

匪亡命奔竄我兵竭力追趕殲賊甚多迫至黃

楊坡山隘路徑逼仄賊匪在兩山峯據守擲石

官兵俱係步行不能遽上沿途擒獲賊匪三十

餘人是晚卽在黃楊坡分駐營卡整集兵力二十九日五鼓搶過黃楊坡於箐林中殺賊二十餘人天甫黎明遙見賊匪在鄧家河一帶山溝屯聚爨烟四起離黃楊坡約二十餘里臣額勒登保督同鎮將等趕緊下坡山路曲折直至午後於王家嶺渠源頭一帶遇賊巴圖魯侍衛等馬上用鎗箭斃賊多人訊據獲賊供稱賊匪要

前至榔坪屯劄

臣

額勒登保恐尾追無濟遂由

渠源頭之東面山梁抄出榔坪之前三十日黎

明已過榔坪上至枯樹壩探得賊匪纔至榔坪

卽折下匝口石山坡出朱漆壠一帶

臣

額勒登

保覓道抄過初一日午間趕至上東陽坡賊匪

正在坡下散漫行走仍令綸布春慶溥等分路

趕下三十餘里至下東陽吳家巖等處奮力剿

殺賊匪死者三百餘人擒獲二十一人並有鄉

民擒獻賊匪十三人

臣

額勒登保一面帶兵進剿

一面將獲賊嚴訊據供林之華覃加耀在路商

量要到巴東縣如能得船過江卽赴宜昌卽西

巫山一帶山大之處藏躲不能得船祇可隨路

再尋險山屯住等語

臣

額勒登保於初三日早

間追賊下高荒坡至朝陽觀沿山殺賊一百多

人餘賊已過羊苓橋該處係一山峽兩面石巖  
只有羊苓石橋一座賊匪在過橋之山巔擲石  
放鎗抗拒時已昏暮不能搶過橋梁官兵卽於  
朝陽觀山梁暫住

臣

福寧於是日趕至沿途帶

領靳文銓等於山洞箐林中搜殺賊匪六十餘  
人此一帶山高嶺大居民本稀賊到之處房屋  
間被焚燒山地內未收包穀亦有踐蹋尙不甚

多避賊民人見官兵已到漸歸本處尙屬寧帖  
其總兵張廷彥由小峰垵一路追賊亦卽會合  
關騰烏爾呼諾帶兵已由榔坪三道河繞上韭  
菜頭截賊此次追殺之賊不下七八百名臣等  
惟有鼓勵將領趕緊追得首逆以冀仰慰

聖厪

同日明亮德楞泰奏言查賊匪經官兵連次剿



敗之後由孫家灣石堰花果園一帶向西奔竄

臣等察看賊情若不分頭攔截徒事追擊賊匪

或北渡漢江或西竄陝境皆費周章必須將西

北兩面賊人奔竄之路堵截使賊人前無去路

勢必折回官兵由石堰花果園前進不惟可與

東北穀城均州一帶捍衛且正可迎頭截擊

一面飭副將劉廷基都司張朋帶領兵勇由鄖陽

江岸相機進發自北兜襲一面飭守備馬應國  
帶領兵勇堵截臣等率兵由石堰等處自東而

西二十九日行至花果園時值霧雨交作探知

賊人竄及黃龍灘意欲北犯鄖郡西擾斗河俱

聞設有兵勇且漢江斗河內船隻俱經撫臣景

安派員押赴對岸賊人不能前進果向東南一

路折回臣等連夜冒雨趕至草甸地方正遇賊

匪分馬步五路前來臣等探明路徑亦飭官兵

分五路進剿臣明亮率領巴圖魯侍衛阿那保

鎮臣長春等帶兵搶上迎面左首山包臣德楞

泰率領巴圖魯侍衛西拉布鎮臣木騰額等帶

兵搶上迎面右首山包惠倫阿哈保溫春等帶

東三省墨爾根官兵及滿漢馬隊兵丁向山麓

大路進擊興蘇率領巴古坦布等帶滿營馬步

兵丁由左首吳家灣山梁進擊達音泰同副將  
李文蔚等率領屯土官兵由右首王家場山梁  
進擊飭令遊擊蕭福祿等帶領撒拉爾回兵設  
伏王家場山後截擊臣等排列甫定賊人蜂擁  
猝至其左右山梁之賊先進犯與肇達音泰兩  
路官兵希圖搶占山梁經興肇達音泰率兵站  
定山頂奮力擊殺賊人見山頂兩路官兵奮勇

左右山溝內又抄出兩股賊衆直撲臣明亮德

楞泰所占山包希圖兜裹官兵後路經臣等督

率將弁官兵分投壓剿鎗礮矢石並下賊人連

撲三次被官兵擊殺無數賊人竄走臣等趁勢

下壓追擊西面山坳林內突出騎馬賊六七百

人向大路飛奔接應經惠倫阿哈保溫春率領

勁旅馳擊賊人膽敢撓鋒前進被官兵鎗擊箭

射人馬俱蹶賊匪策馬四竄惠倫阿哈保溫春  
首先追擊衆兵勇氣倍增箭無虛發賊衆披靡  
向西急逃而<sub>臣</sub>等所擊兩路匪衆見騎馬接應  
之賊窮威狂奔亦捨命竄走經惠倫阿哈保溫  
春等帶兵追殺并飛馬抄向賊前兜截與<sub>臣</sub>等

兩面夾擊當痛加殲戮之際其左右山梁兩股  
賊衆又經興肇達音泰壓剿下山五路官兵追

擊兇殺將賊匪逼向九鋪灣楊溝口等處刀砍

矛扎及鎗箭所斃共計一千三四百人生擒活

賊一百二十三名婦女一百八十九名賊人情

急向西南山澗自投官兵併力轟打擊斃及投

澗死者不下二三百人後隊賊人亡命奔逸卽

從澗內積尸之上倉惶逃遁竄上陳家山梁惠

倫阿哈保溫春達音泰等率領滿漢馬隊屯土

兵丁渡澗追殺遊擊蕭福祿都司馬良棟率散  
拉爾回兵搶上山梁截擊騎馬賊人乘山霧迷  
漫翻山飛竄惠倫阿哈保溫春達音泰率馬兵  
追擊阿哈保所騎之馬忽被鎗傷遂換騎跟役  
之馬進追馬復被鎗不能前進協領傅德防禦  
五十七及該副都統跟役二名趕上抵殺俱受  
矛傷陣亡惠倫達音泰見阿哈保連傷二馬并



見賊隊內有執紅白旗指揮衆匪者三四人料  
係首逆恐其遠遁飛馬進追至長坪地方將一  
執旗頭人之馬射倒正欲趕上生擒詎餘匪捨  
命搶護直前格鬪惠倫奮力擊射立斃數賊猝  
爲賊鎗所中墮馬復受矛傷二處竟至陣亡佐  
領福蘇及親隨護軍校舒靈呢馬訥藍翎長雙  
靈保等直前救護亦被鎗傷同時陣亡阿哈保

達音素溫春帶兵搶上竭力攻擊將賊壓下蕭  
福祿馬良棟亦帶撒拉爾回兵趕至抵剿連斃  
十餘賊賊始敗逃從陳家山內大埡口竄走官  
兵復追過兩座山包賊人俱竄屯大埡口後山  
大梁該處山高林密官兵自卯至未力戰多時  
又值山霧愈大前進恐不得力當令於大埡口  
暫行休息自此前進重山層疊可以扼要堵剿

臣

等卽日率兵緊躡進剿相機兜截總不與賊

以暇賊匪自難肆逸再惠倫自抵軍營奮勇殺

賊今臨陣捐軀

臣

等不勝悵悼愧憤當經購備

一切卽日委四川都司楊森及千總等員就近

護送至鄖陽由水路先至襄陽俟吉林索倫及

各起官兵到齊再令委員楊森及該家丁護送

遄歸現已咨明撫臣汪新查照辦理

同日景安奏言吉林官兵於九月初三日刊齊

臣

前聞察哈爾馬匹不能趕及當卽飛飭藩司

吳璥分派幹員設法購辦一面商同汪新飭令

襄陽道府就近趕買九月初四日通計陸續解

到馬七百餘匹又襄陽道府購買本地馬三百

匹

臣

卽囑賽冲阿派員自行挑揀支給前二起

吉林官兵五百名騎用並酌帶馬匹以便沿途

抽換賽冲阿卽於初五日帶領先行起程馳赴  
明亮等軍營剿賊臣並派直隸山西官兵一千  
名隨同前進現在烏爾圖那遜帶領頭起索倫  
官兵亦於初四日到襄其在後各起官兵自可  
陸續前來惟察哈爾馬匹尙無入豫之信臣已  
節次迎催俟馬到時謹遵

諭旨每兵一名給馬二匹隨到隨放接續前進俾得

替換乘騎沿途足資照料實爲一舉兩得再

臣

接准秦承恩來信據稱西路賊匪在西鄉一帶

近城焚掠設竟竄過漢中不但鳳翔一路似爲

牽動卽西安省會亦必震驚又東路白河賊匪

自豐都統陣亡賊勢益張現已闖入洵陽境內

倘竄入興安則全郡震動若闖至鎮安不特逼

近省城且恐卽由商雒山陽闖入豫境囑

臣

撥

兵前往堵剿復探得明亮等所追之賊竄至花果園地方係向竹山竹谿之路亦通陝省白河縣境查陝省西鄉洵陽等處豫省閿鄉廬氏淅川一帶均無兵力

臣

現派山東河南官兵二千

名交王文雄帶領先行由北抄道馳赴陝豫交

界察探賊蹤相機截剿

臣

一面迎催察哈爾馬

匹料理官兵分起前往明亮等軍營一面仍不

時探聽西路信息如須策應臣卽酌辦續到緣

營官兵前往協應

同日秦承恩奏言東路賊匪經官兵截剿後由

倉上沙溝大棕溪一帶分屯滋擾欲伺隙偷渡

漢江臣先期將船隻收歸北岸並令溫承惠等

帶兵在渡口攔截臣親赴江岸督率防堵賊匪

屢次撲至江邊俱被兵勇擊退賊因不能渡江



隨於八月二十八九等日全數西竄洵陽之赤  
巖溝一帶該處山徑紛歧南路可通竹谿竹山  
西南可通平利正西可至安康

臣

已飛飭地方

官將緊要隘口挖斷設卡嚴防惟地方遼濶兵  
力尙單適宜綿所調肅州官兵一千名札令交

臣

調遣已飛催該領兵官由南山小路星夜前

來卽當上緊設法兜剿至西路賊匪前於八月

初間屢次撲近西鄉邊卡節經呂有成文需等  
奮力追擊賊復西竄白陽關擾及罐子山一帶  
漸近縣城若由西北奔竄即可直趨漢郡

臣

因

漢中爲川陝咽喉北通鳳翔西安最關緊要當  
卽飛飭遊擊額爾畢濟呼等帶領弁兵由郡城  
馳赴西鄉私渡河迎頭堵截二十五日申刻賊  
匪竄至漂草灘額爾畢濟呼等卽由私渡河馳

往迎捕鎗斃賊匪百餘人賊遂繞西鄉縣南路  
東至堰口焚掠文需等帶領兵勇趕抵五子觀  
山梁賊匪向上攻撲文需等督率兵勇放鎗擲  
石擊斃七十餘人賊匪下山奔竄兵勇奮追又  
擒獲男婦二十七名賊遂乘夜翻山擾及石泉  
之繪溪口臣隨飛飭額爾畢濟呼等會合兵勇  
向前追捕並札飭田有成帶領防守界牌兵勇

取道兜剿一面飛檄防守紫陽之榆林府知府  
托銘等帶領兵勇在石泉紫陽一帶迎頭堵截

臣惟有竭盡心力層層布置將東西兩路賊匪

次第設法掃除惟探聞襄宜之賊經明亮德楞

泰等在宜城等處會剿賊遂西竄均州逼近卽

縣其西卽係白河倘再竄入陝境與現在屯聚

洵陽之賊合夥則賊數愈多臣已飛咨明亮等

設法攔截並督率兵勇在白河洵陽各要隘嚴  
密防範以免闖入滋擾

同日英善奏言臣於九月初一日接到秦承恩

知會東西兩路賊匪俱闖入陝疆分爲三股由

簡池壩一帶焚掠該撫不能兼顧囑臣親統勁

兵馳赴西鳳一帶迎堵臣當於河州涼州二鎮

抽撥兵一千名就近檄令河州鎮保興統領山

鞏昌白馬關一路直赴漢中西鄉一帶迎剿

臣

卽於本月初三日親帶省標及固原寧夏官兵

一千名由大路馳赴鳳翔漢中一帶剿禦均奏

入

上命軍機大臣傳諭宜綿明亮額勒登保德楞泰忭

瑞景安秦承恩柯藩日額勒登保等所殺賊匪無

多首逆仍未擒獲又竄至羊苓橋地方賊匪甫到

該處又誰爲之壘石拏卡額勒登保等如果能盡力兜剿何難卽時擒獲可見伊等摺內所稱痛剿窮追之語全屬空言至福寧本與額勒登保同在一處剿賊何以此次又復落後著傳旨嚴行申飭現在林之華等勢窮力竭額勒登保等務須迅勉圖功速擒首逆至秦承恩奏防堵東西兩路竄匪各情形辦理俱合機宜此時英善檄令河州鎮保

興帶兵赴漢中西鄉迎剿又親帶兵赴鳳翔漢中  
一帶剿禦自可得力前令恒瑞柯藩星往白河幫  
同秦承恩剿賊想亦迅速到彼務須上緊截剿一  
面扼住北竄漢江之路一面分飭田有成等在西  
鄉一路攔截勿令賊匪竄入城固石泉等處至明  
亮等兇截孫家灣一帶賊匪沿途截殺一千七八  
百名所辦皆好但惠倫因射倒執旗賊目正欲趕



上生擒猝中賊鎗墮馬復受矛傷陣亡可惜之至  
惠倫係明瑞繼子念伊父子均屬陣亡已另降諭  
旨格外加恩矣所有督率打仗分路帶兵各員自  
當加之獎賞以作其氣明亮德楞泰俱著賞嵌玉  
帶頭帶環玉搬指大小荷包興肇阿哈保達音泰  
木騰額長春溫春俱著賞玉搬指大小荷包其打  
仗陣亡之協領傅德佐領福蘇防禦五十七護軍

校舒靈呢馬訥藍翎長雙靈保俱著各部加一等  
優卹此時賊匪雖不能向西北奔逃但現由大壩  
口竄入山內該處重山層疊無難扼要堵禦總在  
明亮等設法擇險堵截將賊匪圍住山內立即生  
擒不可再令突圍而出竄至房縣保康竹山竹谿  
一帶至豫省閩鄉盧氏等縣均與陝省毗連景安  
已派王文雄帶兵前往截剿自應如此辦理其自

河賊匪闖入洵陽秦承恩已派兵防堵並著景安  
仍當隨時探聽如何處需兵策應卽酌帶官兵馳  
往相機截剿再豐伸布在白河剿賊陣亡該處賊  
匪是否卽係前次在興山保康一帶滋擾另股之  
賊而明亮等現在所剿賊匪是否卽係川省後股  
從宜昌一帶竄往宜城均州之賊並著明亮等查  
明據實速奏

上諭內閣曰御前侍衛公惠倫前經派往軍營打仗  
殺賊頗爲奮勇茲在長坪地方剿捕因射賊墮馬  
正欲趕擒忽中賊鎗陣亡惠倫係奎林之子繼與  
明瑞爲嗣明瑞從前亦係陣亡父子効命疆場實  
爲可憫著交部從優議恤仍由廣儲司賞銀三千  
兩給伊家屬辦理喪事其應襲公爵卽著伊子博  
啓圖承襲俟百日服闋著在御前侍衛上行走以

示朕軫卹盡臣至意

上又諭內閣曰明亮奏單開軍營出力人員內頭等侍衛溫春著賞給副都統職銜在領隊大臣上行走三等侍衛鄂爾綏著賞給法克薩巴圖魯名號仍照例賞給銀一百兩餘著照所請行

十四日

庚辰

秦承恩奏言東路賊匪西竄赤巖分

爲兩股一由香爐溝竄近安康邊界一由花園

寺窠近平利邊界當飭都司王萬年帶領督標  
兵五百名前赴平利防護縣城並杜其北窠之  
路一面抽撥兵勇親自帶赴安康邊界相機堵  
剿賊人連日在賀家壩山梁下分屯滋擾臣隨  
馳赴該處觀看地勢飭令隨帶兵勇暫駐壩內  
不使賊人窺見虛實初三日晚密派叅將鍾岳  
韓城縣知縣莊振等帶領兵勇伏于壩口之左

叅將富靈保等帶領兵勇伏于堽口之右各於  
五鼓潛下山梁左路之兵迎面直撲賊營右路  
之兵繞出賊營之後截其去路初四日黎明鍾  
岳莊振帶同外委劉官捐職從九品汪兆洪等  
出賊不意衝入賊營賊人倉惶抗拒我兵鎗箭  
齊發殺斃四百餘人賊遂向南奪路奔逃適富  
靈保帶同弁勇等正在整兵相待奮力邀擊又

殺死賊匪三百餘人。生擒十三人。餘賊俱翻山  
南竄。平利之魏家壩。其另股竄赴平利之賊。初  
三日到董家梁。正值署平利縣知縣任奎光。帶  
領鄉勇在該處紮卡堵禦。賊匪直前攻撲。該縣  
督率鄉勇義首王英等奮力迎敵。擊斃賊匪一  
百餘人。賊猶抵死上撲。又經王英等奮勇向前  
施放鎗礮。擊斃七十餘人。賊始退回。由西南小



路竄至平利之汝河當卽飛飭該地方文武員弁堵截適前調肅州官兵一千名已抵興安

臣

星夜趕回面爲商酌卽令添帶督標肅州等起

官兵馳赴平利兜圍截殺以期迅速掃除惟探

聞襄宜之賊由均州西竄擾及鄖縣之黃龍灘

等處距白河僅一百餘里

臣

已派令都司龔鐸

帶兵五百名添撥鄉勇在白河境內擇險堵禦

勿令闖入再西路竄匪近竄至石泉之柳溪地方砍伐竹木意欲紮筏偷渡經護遊擊李景督率弁兵星赴柳溪對岸施放鎗礮轟擊賊匪退回山梁屯紮現在宜綿續調之撒拉爾回兵頭起三百六十名已到漢中現飭令該領兵官卽由漢中坐船順流迅赴石泉會同前派遊擊額爾畢濟呼都司韋洪等合兵兜剿並在宜綿札

會因陝西東西兩路俱有竄匪令恒瑞回陝會  
剿計期亦可到境正可趕止賊匪痛加殲洗奏  
入

上命軍機大臣傳諭秦承恩曰秦承恩帶領兵勇親  
赴安康邊界邀擊賊匪殲戮七百餘人其另股竄  
至平利之賊復經該地方官督率鄉勇堵剿賊始  
潰逃不至撲近興安郡城所辦尙好賊匪現向平

利之魏家壩等處分竄係在平利何方此時是否  
在彼屯聚抑又竄往他處此二股賊匪內頭目係  
屬何人著該撫查明覆奏至由西鄉竄至石泉之  
賊意欲紮筏偷渡亦被官兵擊退其帶兵營員李  
景尙屬奮勉著加恩以應陞之缺卽用從九品汪  
兆洪外委劉官等亦屬出力均著咨部議敘

十六日

壬午

宜綿奏言查方山坪賊匪自經官兵

攻克賊巢該首逆等率領餘匪逃赴邱家堡沙  
溪坳等處屯紮並於附近一帶深林密箐潛行  
埋伏遇有探哨兵勇卽放鎗出拒經臣飭令各

鎮將逐路搜剿殲斃八九百名生擒三十四名  
訊據賊目顧銘德等供稱羅其清冉文儒等現

在商議分路一股欲搶江陵溪糧臺一股欲從  
白山場繞出達州後路一股欲搶江口糧臺直

往巴州並有王三槐等帶領夥黨三四千人在  
尖山坪邀約所以派我等帶一千多人在方山  
坪脚下埋伏要將追兵截退再定去向等語查  
江陵溪白山場等處均經預派兵勇防堵本嚴  
江口一路亦有大河攔截未能徑渡且賊匪所  
供亦不過播散謠言自未便因此受其牽掣  
臣  
卽嚴飭各鎮將趕緊進兵三十日五鼓總兵富

爾賽督率遊擊花良阿等帶兵攻剿邱家堡總  
兵朱射斗督率叅將王清弼等帶兵攻剿沙溪  
劫紅銅寨總兵百祥督率叅將圖興阿等帶兵  
攻剿須峯寨並派副將雷仁遊擊常明等帶領  
官兵署遊擊羅定國知州劉清等帶領鄉勇分  
左右兩路夾攻尖山坪各路同時進發賊匪率  
衆出敵我兵奮力衝擊自卯至未愈攻愈力斃

賊甚多匪衆首尾不能相顧紛向岳家院等處潰逃我兵乘勝追趕維時尖山坪屯聚賊匪經雷仁劉清等兩路夾攻亦由岳家院一路敗竄各路兵勇分投截殺計斃賊匪一十餘名生擒十九名並將邱家堡沙溪坳紅銅寨須峯寨尖山坪五處賊營全行燒燬餘匪竄至岳家院胡家梁一帶分屯散處惟西北之通江巴州兩面



前雖酌派將弁帶兵趕往督同各隘口鄉勇防堵第山雜路歧誠恐守禦稍懈臣現在一面再

行添派兵勇設卡圍防一面督飭該鎮將等趕緊兜剿其白巖山一路舒亮等於前月二十八九等日連次督兵攻剿賊匪固守巢穴並不出敵首逆林亮功等因被脅入夥之人間有投出卽與賊目賴儀章等分立賊卡五座把守甚嚴

續有逃散黨與一經查獲卽行戕殺我兵未能  
徑上初二日賊匪數千向乾溪子李家嚴一帶  
焚掠當派將備帶兵馳往剿擊斃賊三四百人  
餘匪仍敗回巢穴查該處賊巢遼濶現有兵力  
無多是以派委知府朱爾漢馳赴開縣協同道  
員李憲宜等於白巖山附近趕緊添募精壯鄉  
勇協同圍堵如徐添德羅其清等卽日就擒則

移兵白巖山一路剿辦更可迅速嚴事再楚省  
剿散餘匪竄回巫山奉節境內經總兵德齡等  
帶兵剿辦八月二十九日賊匪率衆直撲放牛  
坪營卡該鎮督兵擊斃三四十人賊匪稍退復  
又分股蜂擁前來該鎮親率將備帶兵衝擊殲  
賊五六人遊擊吳三泰射傷執旗紅衣賊目二  
名賊衆奔救吳三泰身受鎗傷千總周士遠把

總陳傑越隊直前將賊目砍斃賊衆始行奔潰  
我兵奮力追剿復斃賊匪二百餘名生擒十四  
名兵勇亦間有損傷餘匪竄至鍾嘴一帶屯紮  
刻下伊里布等所帶滿漢官兵計日亦可趕到

臣現飛飭該鎮等務卽趕緊剿洗又接秦承恩

知會竹谿竄匪業經闌入陝境其白河洵陽本

境地方復有新起匪徒勢頗鴟張臣查該處係

在興安郡城之東道路紛歧現有官兵爲數單  
薄若賊匪由洵陽竄入鎮安則商雒山陽一帶  
備禦事宜不可不預爲籌計查自太平截回竄  
匪業已分股闌至西鄉境內而王三槐徐添德  
餘孽尙在川省通巴一路與方山坪竄匪合夥  
刻下惠齡恒瑞慶成等督兵追剿俱入西鄉惟  
因該處秋雨連綿山險路滑兵行甚艱已飛

咨恒瑞先帶原領本標官兵趕赴興安會同秦  
承恩等分投堵剿

同日汪新奏言臣因吉林官兵已於初三日到

齊而察哈爾馬匹尙無抵楚的期臣隨與景安

酌商查據東陽道府並豫省分投購辦壯健大

馬一千三百匹足數分給乘騎先後馳赴明

亮等軍營其索倫頭起官兵一千四百名已於

本月初五至初十等日陸續到襄隨卽應付前進至頭股賊匪已由竹山竹谿竄入陝省白河洵陽界內查白河縣係在漢江南岸對面卽係湖北鄖西地界該處河面淺窄先經臣派委道

員張道源督率駐劄江干多集鄉勇防守賊匪於八月十五日竄至南岸尾子池溝口欲圖涉淺搶渡兵勇鎗礮齊發賊卽由羊坡一帶退去

又明亮德榜秦所追一股賊匪於八月二十九  
日竄至鄖縣南岸黃龍灘地方該縣督率鄉勇  
在北岸排列鎗礮嚴密堵截賊匪由淺處策馬  
搶渡該縣隨督勇施放鎗礮擊斃騎馬賊匪三  
人餘賊畏懼退走由花果園折回草甸明亮等  
又派副將劉廷基都司張鵬帶領兵勇一千餘  
名前赴鄖陽北岸防堵聲勢益壯已可毋虞竄



趙再帽子山賊匪因圍剿緊急於前月二十二  
日夜由一碗水地方捨命衝出經額勒登保福  
寧帶兵截殺殲斃甚多餘匪由歸州巴東一帶  
奔逃額勒登保等估道窮追臣已飛飭臬司張

長庚道員舒永阿等督令附近各屬探明官兵  
所向將軍糧軍火源源趕運俾資接濟至川省  
奉節竄入利川之賊副將樊繼祖帶兵前往斬

賊甚多惟兵力尙單一時未能盡殲

臣

又派

湖南調來官兵四百名交與樊繼祖帶同協剿

再鹽道保定自上年孝感賊匪滋事卽率同商

人捐雇鄉勇數千親身帶領在漢口地方晝夜

防範商民賴以安堵本年正二月間賊匪竄入

孝感黃陂等處意圖窺視漢鎮該道復添捐健

勇實力堵禦且幫同藩司祖之望辦理軍需悉

心籌畫不辭勞瘁現在委令防堵下游漢江亦  
極認真實爲急公出力

同日觀成劉君輔奏言老木園一帶地處萬山  
之中時常秋令霧雨連朝山徑險滑急切不能  
進攻查樵風洞設立賊卡緊接巢穴賊匪恃爲  
保障若將此處攻獲該匪等失其險要即可直

搗中堅二十六日

臣

劉君輔督率遊擊楊洪新

等帶領兵勇各攜口袋黑夜由柏樹巖直攻樵

風洞賊卡

臣

觀成帶領遊擊德清額等隨後進

發鎮臣徐昭德遊擊朱進廷等分帶兵勇在冉

家溝野竹溪蜈蚣嶺進攻牽綴賊勢二十七日

五鼓楊洪新同署都司李寅等各帶兵勇從石

磴陡坎曲折而上潛近賊卡該匪所挖濠溝寬

深並於濠溝內密插竹簽李寅飭令兵勇將所

帶口袋裝土填塞濠溝李寅首先過濠砍開木  
卡卡內賊匪驚覺捨命格鬪李寅奮不顧身左  
右擊殺身受矛傷數處候補守備黃有學外委  
楊成元亦俱奮勇殺賊身受矛傷均各殞命我  
兵人人憤怒刀砍矛刺將卡內大小男婦百餘  
人悉數殲斃<sub>臣</sub>等趁勢催令兵勇直搗賊巢忽  
聞轎頂山礮響知係賊人前來援應惟時天色

甫明臣觀成督率遊擊德清領都司馮培元等

帶領兵勇卽於樵風洞山梁迎頭截剿該匪蜂

擁而至官兵旋放連環鎗礮轟擊賊匪敗退馮

培元帶領兵勇攀越嶺谷追趕剿殺詎有賊匪

從旁突出馮培元及把總江永輝俱猝被矛傷

陣亡外委殷正魁頭帶石傷臣等卽督催官兵

接應鎗箭並發斃賊二十餘名賊始敗退竄上

老木園山梁時已天晚隨飭令弁兵於樵風洞  
修築木卡暫駐再圖進攻均奏入

上命軍機大臣傳諭宜綿明亮德楞泰惠齡觀成恒  
瑞慶成舒亮穆克登阿曰此次宜綿帶兵分路進  
攻奪獲邱家堡等五處賊寨賊匪俱竄至岳家院  
一帶並未獲一賊首不過於賊匪逃竄後將空寨  
焚燒誰則不能且賊逃至岳家院宜綿等何不設

法繞出賊前乃祇知在後尾追大屬非策其白

山一路舒亮穆克登阿等攻剿多時亦未能直搗  
賊巢卽使賊匪負隅拒守寧不當尋路進剿豈有  
束手無策與賊相持之理宜綿舒亮穆克登阿俱  
著傳旨申飭又觀成等進攻樵風洞並未拏獲賊  
目一人而帶兵官員轉致傷損五人大爲不值觀  
成劉君輔亦著傳旨申飭所有打仗陣亡之都司



馮培元等俱著咨部加等優卹看來宜綿等各路  
俱不足恃現在明亮德楞泰屢殲賊衆軍威已振  
又調往之吉林官兵俱已到彼其黑龍江官兵及  
察哈爾馬匹日內亦可陸續到齊明亮等正可馳  
驟殺賊惟是賊匪見官兵聲勢浩大自必紛竄狂  
奔若前路無兵堵截則賊匪四散逃逸必致仍前  
尾追使生力勁兵又形疲乏宜綿惠齡恒瑞等卽

不能痛殲賊匪豈亦不能堵截其竄走之路乎若  
該督等務須探聽賊蹤設法布置預行堵截使賊  
匪無從乘間奔竄明亮等得以盡力剿殺而明亮  
等亦當察看情形或於新到官兵內派令得力將  
領酌量分帶勁兵覓道繞出賊前首尾合擊自更  
可事半功倍也又汪新料理吉林官兵起程前赴  
軍營並調備馬匹等事所辦尙好道員保定節次

堵禦賊匪幫辦軍需勉奮出力著加恩賞戴花翎  
以示鼓勵再川楚陝西等省被賊蹂躪地方屢經  
降旨令該督撫加意撫卹此時賊匪奔竄焚掠難  
民必多失業若不妥爲安撫轉恐去而從賊並著  
該督撫等督飭所屬實力撫卹毋使流離失所爲  
要

同日宜錦又奏言查湖北地方官兵分投剿賊

轉運事務本繁其宜冒所屬之巴東歸州東湖等處自經邪匪蹂躪居民逃避人夫雇覓維艱撫臣汪新現在荆襄一帶辦理軍務恐其勢難兼顧而川省協濟糧石已據總理司道等稟報自夔開運自應另派大員專駐宜昌接運籌辦查明興曾任封疆前因賊匪擾及夔州經臣派往督辦糧餉諸凡無悞刻下夔州發運協濟楚

省軍糧並大寧一路所需軍火糧餉尙有松茂  
道承勲暨該府張至幹隨時籌辦足資經理而  
宜昌一路較爲緊要臣已知會明興就近速往  
宜昌督同該地方官接收轉運並查此項軍糧  
前經

奏明運至巴東交卸近聞巴東船隻稀少且剝船  
過載恐致稽延已飭令承勲等卽用原船直運

宜昌交收以期迅速奏人報

聞

十九日<sup>乙酉</sup>英善奏言<sup>臣</sup>行抵涇州途次復接秦

承恩來信因宜綿現今柯藩自太平起程赴陝

恒瑞由通江邊界赴陝會商分剿令<sup>臣</sup>暫駐甘

省邊界候信惟現據東路洵陽白河等處稟報

賊匪於漢江南岸分股滋擾尙未殲滅而西路

奔至西鄉石泉之賊現又竄至兩河口黃河壩等處砍伐竹木拆毀民房似欲紮筏渡江僅有署鎮及道府遊擊等官堵禦兵力尙單倘再偷渡漢江所關匪細恒瑞柯藩雖自川起程來陝可資得力而方山坪竄匪及徐添德王三槐諸賊經宜綿等剿捕緊急恐或有竄逸則通江巴州一帶與漢中在在連界是漢中一郡實爲緊

要臣

此時若在甘省邊界駐劄相隔較遠是以

仍卽兼程督兵前進馳赴漢中並飛催保興所  
帶之兵星馳前進察看何處最要卽當督兵迎  
剿庶漢中與川省連界地方處處有兵堵禦逸  
賊不致竄入奏入

上命軍機大臣傳諭英善秦承恩汪新曰英善以漢  
中緊要馳赴督率截剿自應如此至賊匪竄至石



泉之兩河口黃河壩等處意欲紮筏偷渡該處賊  
匪是否經地方官擊退不致偷渡著查明具奏又  
前據汪新奏白河賊匪竄至南岸尾子池溝口欲  
圖涉淺搶渡經兵勇截回現在已交冬令正值水  
落之時著秦承恩飭令地方文武嚴密防守再臬  
司高杞已降旨陞補福建布政使現在湖北軍務  
未竣該員尙有承辦軍需事件自未便卽赴新任

著汪新諭令高杞倍加奮勉統俟軍務完竣再赴  
新任

二十日丙戌明亮德楞泰奏言臣等率兵緊躡賊

蹤行至高賢川地方拏獲隱伏山坳探望官兵  
之賊六名訊據供稱自到湖北以來被官兵處  
處繞道抄殺傷折數千人今被官兵逼到房縣  
從房縣翻山出去可以由竹山竹谿逃到陝西

或者山路幽僻可以覓路前去與竄往陝西白  
河一股合夥好敵官兵等語

臣

等查房縣竹山

竹谿鄉勇頗稱勇往當飭該處府縣及各卡鄉  
勇嚴加防堵一面飭副將劉廷基都司張鵬帶  
領兵勇繞赴楊圩口堵截使賊人不得進擾房  
縣

臣

等率兵由馬家峒太山鋪一路前進賊匪

初由羊子山西竄汪家河經該處鄉勇截殺不

能衝越遂取竄地丁鋪思欲進擾房縣又經劉廷基等迎擊復向西南毛坪軍馬鋪一帶奔逃

臣等進至汪家河察探賊人連日奔突一聞前

有官兵卽行他竄非出其不意兩路兜剿不能

截殺查軍馬鋪以西卽入竹山縣境復飛飭劉

廷基等帶領兵勇跟蹤進追以堵賊人折回房

縣之路臣等率兵由馬尾三家塘抄向賊前攔

截初六日官兵進至界山塘正值賊人自芹口

前來衝突鄉勇卡座臣等當派巴圖魯侍衛溫

春鎮臣木騰額等帶兵分隊於山頂林內設伏

待賊大隊行至山前突出剿殺賊匪倉卒不能

抵拒卽亡命狂奔被官兵橫衝兜截斃賊二百

餘名其後隊賊人卽竄上西南山梁思遁臣等

同興肇率阿哈保等帶馬隊及屯土兵丁飛追

進擊復斃賊百餘人餘賊翻山由東河西竄

臣

等察看路徑東河之西卽爲小深河田家壩離

竹山縣城二十餘里該處鄉勇現在有赴陝西

白河一帶協剿者有在斗河一帶防堵者萬一

賊人竄至彼處恐近城一帶村莊不無驚恐遂

由霍山繞出竹山縣城南馳赴小深河初九日

午刻至北岸老虎集聞前面鎗礮之聲催促官

兵趕緊進發適賊人衝撲田家壩鄉勇卡座將

欲搶渡小深河

臣

等督兵渡河衝上山梁兩路

擊剿詎賊人自上下撲拋擲石塊併力抗拒阿

哈保達音泰等率馬兵首先衝殺佐領永恪布

驍騎校厄勒錦藍翎領催連陞皆力戰被傷陣

亡達音泰所騎之馬被鎗所傷該鎮復換馬趕

上衆兵亦怒不可遏一擁而進斃騎馬賊五名

步賊十餘名賊人稍退劉廷基張鵬等亦帶兵  
追至其後來攻殺賊百餘人生擒十三名賊人  
向南敗走時已向晚不便窮追當令官兵在小  
深河山梁暫駐以定縣城內外民心一面派守  
備馬應國帶兵勇三百名緊跟賊蹤察看竄向  
伺所相機進剿

同日額勒登保福寧奏言臣等剿賊至羊苓橋



過橋卽係歸州所屬之馬胡營山四面峯巖陡

削地面亦寬路徑不一無不險峻見賊匪上山

時卽運石塊趕築卡牆意欲爲屯聚之所臣等

於初三日二鼓分路進兵臣額勒登保帶同富

森布張廷彥等由馬胡營之左九灣一帶分路

進攻臣福寧帶同慶溥許文謨等卽由羊苓橋

一路進攻使賊匪不能兼顧臣額勒登保於初

四日攻擊一日之久由九灣上至王家埡采入  
三十餘里殺賊二百餘名生擒四十六名賊匪  
在王家埡抵死抗拒晚間暫行劄營

臣

福寧是

日督兵一面在羊苓橋山上用礮轟擊對面馬  
胡營山坡之賊一面卽搶過羊苓橋趕上山坡  
十數里燒燬賊棚四處殺賊一百餘人生擒十  
九人賊匪踞高滾木擣石未能卽時直到山巔

臣

等彼此札商初五日仍督率官兵再行攻擊

王家埡賊人集衆死拒自五鼓至已刻尙未攻

得

臣

額勒登保率領侍衛官兵等奮力上撲直

至午後綸布春格布舍等始得帶兵搶過王家

埡一路殺賊逕由上磯頭九名觀直入馬胡營

山有破竹之勢斃賊不計其數賊之器械隨處

拋棄兵勇等割獻首級亦多生擒僞先鋒李植

一名餘賊十五名

臣

福寧與慶溥將官兵分爲

數路另行覓道齊上賊匪不能抵禦都司孫應

奉守備李光晟首先搶至山巔上下坡坎殺戮

甚多隨與

臣

額勒登保所帶之兵相合周圍搜

殺迨至孟家堦地方賊匪聚衆在隘口抗拒官

兵奮勇搶攻卽得隘口衆勢下壓維時關騰於

韭菜坡帶兵亦已趕至孟家堦之西兩面夾擊

賊匪倉惶遁入溝內時已昏黑溝深坡陡不能

遽下臣等訊據賊供林之華覃加耀來至馬胡

營山見山場寬濶糧食亦足本思據險久住因

官兵進攻甚緊林之華覃加耀已先由馬胡山

營之白巖一帶潛逃等語查白巖一路係歸州

地界與巴東接壤臣福寧帶兵由巴東之榔坪

一帶攔截並分令慶溥帶兵出桃坪一路追殺

關騰帶兵從白毛嶺天鵝坑等處堵截

臣額勒

登保卽同綸布春等由白巖高家嶺馬家山一

路追趕初六日於馬家山遇賊打仗賊匪竄入

高家嶺山溝初七初八兩日我兵自高家嶺追

壓賊又竄至小巖口紅巖河初九日賊復於土

橋嚮板溪竄上巴東地界之高梁寨官兵到處

截殺及沿途民人捉獻之賊不可勝計

臣額勒

登保於初十日分兵兩路進剿賊又亡命四竄

臣

福寧於榔坪一帶抄截行走初十日來至金

象坪與

臣

額勒登保會合沿途拏獲竄匪三十

餘人但林之華覃加耀尙在豕突狼奔未卽就

獲此次連日所殺之賊統計又有二千餘名其

附從餘衆日就消滅

臣

等現卽分路緊剿以期

卽日掃除再疊次打仗守備羅宗禮外委吳占

趙俱奮勇殺賊陣亡副將汪啟腰帶石傷都司  
孫應奉鎗傷右腿此外傷亡弁兵鄉勇容另查  
明咨部辦理均奏入

上命軍機大臣傳諭明亮額勒登保德楞泰福寧曰  
明亮等所奏情形祇係截剿賊匪殲獲不過三百  
餘名賊匪又向南敗走殊不滿意此次打仗時計  
吉林黑龍江勁兵尙未到彼明亮等僅就原帶之



兵分投截剿是以不加深責現在賊匪由竹山小  
深河山梁向南敗走官兵是否可以兜截不致竄  
入竹谿一帶未據聲敘且姚之富等欲從幽僻小  
路竄往陝西白河是賊匪欲與前股楚匪合夥則  
官兵又成尾追之勢明亮等探明賊蹤務須逼向  
東趨歸入房縣山內以便擇要圍剿所有陣亡之  
佐領永恪布等俱著咨部加等議卹額勒登保等

雖將羊苓橋賊匪追殺而首逆復竄至巴東地界之高梁寨仍未能設法兜圍摺內所稱官兵痛剿俱屬空言額勒登保福寧著再傳旨嚴行申飭其打仗陣亡之守備羅宗禮外委吳占超均著咨部加等議卹至明亮等摺內稱房縣竹山竹谿鄉勇頗稱勇往飭令嚴加防堵一節鄉勇等雖係地方官雇覓得有口糧但能奮勇防禦亦屬向義可嘉

其中有實在出力者著查明優加獎賞俾知鼓勵  
至領兵大員等尤須加以愛護不可祇令鄉勇在  
前禦賊而官兵轉在後接應以致無所統率不能  
得力再首逆姚之富齊王氏等是否卽在此次明  
亮等所剿賊股之內抑另在白河股內並著確查  
具奏